



Datë: 21.03.2025
Numër Protokolli: 2177/2025

A.nr.2127/2024

Këshilli i Pavarur Mbikëqyrës për Shërbimin Civil të Kosovës-Kolegji për Shqyrtimin dhe Vendosjen e Ankesave në përbërje nga: Malsore Gashi-Bajraktari, kryetare, Eshref Shabani dhe Ardita Haxhnikaj-Demi, anëtar, me Atdhe Gashi, në cilësinë e procesmbajtësit, kanë shqyrtuar ankesën me numër A.nr.2127/2024, të datës 30.12.2024, të parashtruar nga ankuesi G.Sh, kundër organit të punësimit: Shërbimit Korrektues të Kosovës, në çështjen juridiko-administrative “*Kontestim konkursi*”, duke vepruar në pajtim me nenin 6, paragrafi, 1 nën paragrafi, 1.2, nenin, 16 paragrafi, 3 dhe nenin, 18 paragrafi, 1 nën paragrafin, 1.1 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, i ndryshuar dhe plotësuar me Ligjin Nr.08/L-180 si dhe në mbështetje të Rregullores Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim të mbajtur me 21.03.2025, mori këtë:

V E N D I M

I. Aprovohet si e bazuar ankesa me numër A.nr.2127/2024 e datës 30.12.2024, e parashtruar nga ankuesi G.Sh, ashtu që **Anulohet** Lista e rezultateve përfundimtare me numër protokolli 511, e datës 20.12.2024, e publikuar nga Shërbimi Korrektues i Kosovës, lidhur me konkursin e brendshëm për dy (2) pozitat Mbikëqyrës i Lartë në Burgun e Sigurisë së Lartë si dhe procedura e vlerësimit në testimin me shkrim dhe intervista me gojë.

II. Obligohet Drejtori i Përgjithshëm i Shërbimit Korrektues të Kosovës, të bëjë zbatimin e këtij vendimi brenda afatit prej 15 ditësh nga dita e pranimit, duke ndërmarr veprimet të themeloj komisionin për procesin e gradimit, në pajtim me dispozitat ligjore në fuqi, në mënyrë që procedura sipas konkursit të zhvillohet nga faza e shqyrtimit të aplikacioneve.

III. Këshilli i Pavarur Mbikëqyrës për Shërbimin Civil të Kosovës, duhet të njoftohet me shkrim për veprimet e ndërmarra.

A r s y e t i m

Ankuesi G.Sh (*tutje referuar vetëm* Ankuesi), më datë 30.12.2024, ka parashtruar ankesë me numër protokolli 7135/2024 në Këshillin e Pavarur Mbikëqyrës për Shërbimin Civil të Kosovës, kundër rezultateve preliminare të testit me shkrim lidhur me konkursin e brendshëm për dy (2) pozitat Mbikëqyrës i Lartë në Burgun e Sigurisë së Lartë.

Këshilli i Pavarur Mbikëqyrës për Shërbimin Civil të Kosovës (*tutje referuar vetëm* Këshilli), bazuar në dispozitat e Rregullores Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, ka proceduar kërkesën për përgjigje në ankesën e ankuesit tek Shërbimi Korrektues të Kosovës, ndërsa Këshilli më datë 15.01.2025 ka pranuar përgjigjen në ankesë së bashku me shkresat e bashkangjitura.

Kryetari i Këshillit, me datë 14.02.2025 ka nxjerrë Vendimin VK/2025 dhe numër protokolli 985/2025 sipas të cilit i është vazhduar afati ankesës së ankuesit edhe për dhjetë (10) ditë pune.

Kolegji për Shqyrtimin dhe Vendosjen e Ankesave, administroi këto prova (*tutje referuar vetëm Kolegji i Këshillit*): Ankesën me numër protokolli 7135/2024 të datës 30.12.2024 të parashtruar nga ankuesi në Këshillin e Pavarur Mbikëqyrës për Shërbimin Civil të Kosovës; Kopjen e ID-së; Listën preliminare të testit me shkrim me numër protokolli 475 të datës 02.12.2024; Konkursin e Brendshëm me numër protokolli 299 të datës 19.08.2024; Kërkesën dhe Përgjigjën në ankesë të datës 15.01.2025; Kërkesën dhe aprovimin për procedurën e rekrutimit me numër protokolli 798 të datës 06.08.2024; Listën e rezultateve të intervistë me gojë datës 19.12.2024; Vendimin me numër protokolli 991 i datës 21.10.2024 për emërimin e komisionit vlerësuar dhe akt emërimet/kontratat e anëtarëve të komisionit;; Listën e aplikantëve për pozitën Mbikëqyrës i Lartë në Burgun e Sigurisë së Lartë; Kërkesën për punësim të datës 30.08.2024, së bashku me dokumentacionin e dorëzuar nga ankuesi; Kërkesën për punësim të datës 28.08.2024, së bashku me dokumentacionin e dorëzuar nga kandidati A.S; Kërkesën për punësim të datës 09.09.2024, së bashku me dokumentacionin e dorëzuar nga kandidati G.F; Testet me shkrim të ankuesit dhe kandidatëve A.S dhe G.F; Lista përfundimtare e testi me shkrim me numër protokolli 479 e datës 10.12.2024; Lista përfundimtare e intervistës me gojë me numër protokolli 500 e datës 19.12.2024; Lista përfundimtare e rezultateve të testit me shkrim dhe intervistës me gojë, me numër protokolli 511 e datës 20.12.2024.

Kolegji për Shqyrtimin dhe Vendosjen e Ankesave, pas shqyrtimit dhe analizimit të shkresave të lëndës të parashtruara nga palët në procedurë, konstatoi se ankesa e ankuesit është e pabazuar, **sepse:**

Nga administrimi i shkresave të lëndës, rezulton se Shërbimi Korrektues i Kosovës, më datë 19.08.2024 ka shpallur Konkursin e brendshëm me numër reference MD/SHKK/12-14.08.2024 me protokolli 299, për dy (2) pozitë Mbikëqyrës i Lartë, në Burgun e Sigurisë së Lartë.

Tutje sipas shkresave të lëndës, në këtë konkurs kanë aplikuar pesë (5) kandidatë, në mesin e tyre edhe ankuesi, i cili i është nënshtruar testit me shkrim, nga e cila fazë vlerësimi ka arritur gjithsej 55 pikë, të pa mjaftueshme për të vazhduar tutje në fazën e vlerësimit të intervistës me gojë.

Organi përkatës i punësimit, pas përfundimit të procesit të rekrutimit më datë 20.12.2024 ka publikuar listën me numër protokolli 511 mbi rezultatet përfundimtare të testit me shkrim dhe intervistë me gojë, sipas së cilës kandidati A.S me gjithsej 85.2 pikë të arritura dhe kandidati G.F me gjithsej 86.3 pikë të arritura, janë shpallur kandidatë fitues për dy (2) pozitë Mbikëqyrës i Lartë, në Burgun e Sigurisë së Lartë.

Ankuesi, në ankesën e parashtruar në Këshillin e Pavarur Mbikëqyrës për Shërbimin Civil të Kosovës, kundër rezultateve preliminare të kësaj procedure, pretendon se nuk është vlerësuar drejtë në fazën e testit me shkrim për qka i ka pamundësuar kalueshmërinë në fazën tjetër të vlerësimit, rrjedhimisht i njëjti kërkon që kjo listë rezultateve e testit me shkrim të hedhet poshtë ngase nuk vërteton drejtë gjendjen faktike.

Në kuptim të vendosjes lidhur me këtë çështje juridiko-administrative, Kolegji i Këshillit, i'u referua dispozitave të Ligjit Nr. 08/L-197 për Zyrtarët Publikë përkitazi me nëpunësit me status të veçantë, gjegjësisht nenit 6 paragrafi 1 dhe 2, ku përcaktohet: ***“1. Nëpunësja/i civil me status të veçantë është nënkategori e nëpunëses/it civil, ku bëjnë pjesë: 1.1. të punësuarat/it e shërbimit korrektues dhe sprovues të Kosovës; 1.2. anëtarët/ët e shërbimit të jashtëm; 1.3. zyrtarët/ët e Agjencisë së Aviacionit Civil dhe Agjencisë të Shërbimeve të Navigimit Ajror, që kryejnë shërbime operative në fushën e kontrollit dhe navigimit ajror; 1.4. anëtarët/ët e Komisionit për Hetimin e Aksidenteve dhe Incidenteve Aeronautike; 1.5. të punësuarat/it në Ministrinë e Mbrojtjes dhe Agjenci të saj; 1.6. të punësuarat/it në Ministrinë e Punëve të Brendshme dhe Agjencitë e saj, përjashtimisht Policinë e Kosovës dhe Inspektoratin Policor të Kosovës; 1.7. të punësuarat/it në Administratën Tatimore të Kosovës; 1.8. të***

punësuarat/it në Byronë Shtetërore për Verifikimin dhe Konfiskimin e Pasurisë së Pajustificueshme. 2. Rregullimi me ligj të veçantë për nëpunësen/in civil me status të veçantë, sipas paragrafit 1. të këtij nenit, duhet të jetë në pajtim me parimet e përcaktuara me këtë ligj dhe mund t'i rregullojë ndryshe vetëm elementet e marrëdhënies së punës, si në vijim: 2.1. kushte të veçanta apo shtesë për rekrutim; 2.2. të drejtat ose detyrimet specifike të tjera nga ato të parashikuara me këtë ligj; 2.3. rregullat e veçanta për zhvillimin e karrierës sipas sistemit të gradave; 2.4. trajnimet dhe zhvillimin profesional; 2.5. transferimin dhe sistematizimin e nëpunësve; 2.6. përcaktimin e shkeljeve dhe masave disiplinore shtesë; 2.7. disiplinën dhe vlerësimin.

Andaj, duke u bazuar në atë se të punësuarit në Shërbimin Korrektues të Kosovës kanë statusin e nëpunësit civil me status të veçantë, Kolegji i Këshillit, ju referua Udhëzimit Administrativ MD-Nr.07/2024 për Gradat e Zyrtarëve Korrektues, duke konstatuar se konkursi i brendshëm për dy pozitën Mbikëqyrës i Lartë në Burgun e Sigurisë së Lartë, është hapur në pajtim me nenin 7 të këtij udhëzimi, ngazë në këtë rast kemi të bëjmë me avancimin në grada, ndërsa kriteret për gradën Mbikëqyrës i Lartë sipas konkursit janë të përcaktuara konform nenit 9 të këtij udhëzimi.

Kolegji i Këshillit, në ndërlidhje me shqyrtimin e pretendimeve ankimore të ankuesit fillimisht ka shqyrtuar përbërjen e Komisioni të Përzgjedhës, i cili është përgjegjës për vlerësimin profesional të kandidatëve në këtë procedurë gradimi dhe se nga analizimi i shkresave të lëndës, konstaton se sipas Vendimit me numër protokolli 991 të datës 21.10.2024, të Drejtorit të Përgjithshëm të Shërbimit Korrektues të Kosovës, është emëruar komisioni përzgjedhës për procesin e gradimit për pozitën Mbikëqyrës dhe Mbikëqyrës i Lartë në përbërje prej: A.K.-Menaxher i Burimeve Njerëzore DP-Kryesues; P.R.-Udhëheqës për Punë Juridike dhe të Përgjithshme-Anëtar dhe V.N.-Koordinator për Staf në SHKK-Anëtar.

Andaj, duke marr parasysh që procedura e konkursit të brendshëm është përmes sistemit të gradave Kolegji i Këshillit, konstaton se sistemi i gradave është i paraparë sipas nenit 53 të Ligjit Nr. 08/L-131 për Shërbimin Korrektues të Kosovës, i cili përcakton se: 1. Sistemi i gradimit për zyrtarët korrektues është në përputhje me gradat vijuese: 1.1. kadet për zyrtar korrektues; 1.2. zyrtar korrektues; 1.3. mbikëqyrës; 1.4. mbikëqyrës i Lartë; 1.5. udhëheqës i Njesisë. 2. Procedura dhe kushtet për gradim të zyrtarëve korrektues rregullohet me aktin e nxjerrë nga Ministri i Drejtësisë, ndërsa sistemi i njëjtë i gradave është paraparë edhe sipas nenit 3 paragrafi 1 të Udhëzimit Administrativ MD-Nr.07/2024 për Gradat e Zyrtarëve Korrektues, është përcaktuar: 1.Sistemi i gradimit për zyrtarët korrektues është në përputhje me gradat si në vijim: 1.1. Kadet për Zyrtar Korrektues; 1.2. Zyrtar Korrektues; 1.3. Mbikëqyrës; 1.4. Mbikëqyrës i Lartë; 1.5. Udhëheqës i Njesisë. Rrjedhimisht Kolegji i Këshillit, marr për bazë sistemin e gradave në kuadër të Shërbimit Korrektues të Kosovës të përcaktuar me dispozitat e cekura si më lartë, vlerëson se komisioni për procesin e gradimit, duhet të jetë i themeluar përmes sistemit të gradave, me përjashtim të anëtarit të Njesisë së Burimeve Njerëzore, e si rezultat i kësaj, marr për bazë edhe kriteret ligjore për themelimin e komisionit për procesin e gradimit, Kolegji vlerëson se komisioni i themeluar sipas Vendimit me numër protokolli 991 të datës 21.10.2024, të Drejtorit të Përgjithshëm të Shërbimit Korrektues të Kosovës, nuk është në harmoni të plotë me dispozitat e nenit 11 paragrafi 2 të Udhëzimit Administrativ MD-Nr.07/2024 për Gradat e Zyrtarëve Korrektues, e ku përcaktohet: “2.Komisioni përbëhet nga tre (3) anëtarë nga zyrtarët e Shërbimit Korrektues. 3.Kryesuesi dhe njëri anëtarë i Komisionit duhet të ketë së paku një (1) gradë më të lartë se grada për të cilën zhvillohet procedura e rekrutimit. Anëtarit i tretë i Komisionit duhet të jetë nga Njësia e Burimeve Njerëzore”, ngase asnjëri nga anëtarët e komisionit nuk mban pozitë sipas sistemit të gradave.

Përkitazi me konstatimet si më sipër, Kolegji i Këshillit, në bazë të provave materiale të lëndës, dhe konstatimeve të dhëna si në vendim, vlerëson se ankesa e ankuesit është e bazuar, kështu që ka vendosur të anulojë listën e rezultateve përfundimtare me numër protokolli 509 të datës 20.12.2024, për rezultatet përfundimtare të testit me shkrim dhe intervistës me gojë, lidhur me konkursin e brendshëm për gradën

Mbikëqyrës i Lartë në Burgun e Sigurisë së Lartë, dhe të obligoj Drejtorinë e Përgjithshëm të Shërbimit Korrektues të Kosovës, të ndërmarr të gjitha veprimet ligjore të themelojë komisionin për procesin e gradimit, në pajtim me dispozitat ligjore të Udhëzimit Administrativ MD-Nr.07/2024 për Gradat e Zyrtarëve Korrektues, në mënyrë që procedura sipas konkursit të zhvillohet nga faza e shqyrtimit të aplikacioneve.

Andaj, duke u bazuar në nenin 6 paragrafi 1, nën paragrafi 1.1, nenin 18 paragrafi 1 nën paragrafi 1.2 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, Kolegji vendosi si në dispozitiv të këtij Vendimi.

Vendimi hyn në fuqi në ditën e nënshkrimit nga Kryetarja e Kolegjit.

Këshillë juridike: Pala e pakënaqur e cila pretendon se vendimi i Këshillit nuk është i ligjshëm, mund të iniciojë konflikt administrativ në Gjykatën Themelore në Prishtinë/Departamenti për Çështje Administrative, brenda afatit prej tridhjetë (30) ditësh, nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
Lënda me numër A.nr.2127/2024

Atdhe GASHI

Procesmbajtës

Malsore GASHI-BAJRAKTARI

Kryetare e Kolegjit

Vendimi i dërgohet:

- Ankuesit, G.Sh;
- Shërbimit Korrektues të Kosovës
(Drejtorit të Përgjithshëm dhe Udhëheqësit të Burimeve Njerëzore; si dhe
- Arkivit të KPMSHCK-së.